

四庫全書

集部

欽定四庫全書

元音卷六

揭傒斯

字昇碩豫章人集賢學士

去婦詞

江東有一士子留都下三年適要一貴人女為妻久乃知其已有妻子矣一夕逃去因託去婦為之詩非徒欲傳其事抑以示風戒云爾

輕合鮮義終苟容希禮遇遠結萬里婚多為才名悞始

與君結好不知君有婦有女嫁他人俱懷託遲暮青青
牆下草生死牆下路娟娟道傍花零落無處所女子失
其身何以保貞素既乖百年意百年誰能度對鏡空悲
喟中心良難訴浮萍難為託一木無兩附棄舊屬新歡
新歡漸成故寧當中路折莫被他人去寧老阿母傍不
受他人妬騰身出房闈兩絕無復顧豈願嫁他人甘心
西山樹

贈王郎

王郎楚狂士意氣飛秋霜讀書一萬卷下筆數千行富貴視浮雲况肯矜文章十五恥閭里掉臂辭故鄉夜宿東海月朝買西州航瞋目王公前結客少年場一飲或一石一醉或一觴寧揖屠狗人不與俗士當千金不易笑歲暮單衣裳阮籍在窮途英聲連四方鸞鵠有時鍛反愧燕雀翔世無劇孟交不及青樓倡燕趙如花人翠袂黃金璫不識豪俊士空媚癡與狂王郎遠過我坐我枯藜床終夕無酒飲撫髀歌慨慷平明別我去極目空茫

茫

賦得吳歌送人歸吳中

三月酒如澑高堂絲竹停繡筵雙鳳影珠箔亂鶯聲疊
應紅牙拍辭傳金縷名綵雲低不度芳塵暗自驚花發
長洲苑日照闔閭城且奉千金壽寧忘萬里情

題王山仲所藏瀟湘八景圖卷走筆作

瀟湘夜雨

涔涔暗江樹荒荒楚天路穩繫渡頭船莫放流下去

遠浦帆歸

冥冥何處來小樓江上開長恨風帆色日日誤郎回

煙寺晚鐘

朝送山僧去莫喚山僧歸相喚復相送山露濕人衣

洞庭秋月

顥氣自澄穆碧波還蕩漾應有凌風人吹笛君山上

平沙落雁

天寒闊塞遠水落洲渚濶已逐夕陽低還向黃蘆沒

漁村晚照

定從海底出且向平沙照漁網未全收漁舟還下釣

山市晴嵐

近樹參差出行人取次多板橋雙路口此世幾廻過

江天暮雪

孤舟三日住不見有人家昏昏竹籬處郤恐是梅花

李宮人琵琶引

鄖縣亢主簿言有李宮人者善琵琶至元十九年以

良家子入宮得幸上比之昭君至大中入事興聖宮
比以足疾乃得賜歸侍母給內俸如故因亢且乞詩于
予遂作李宮人琵琶引其辭曰

茫茫青塚春風裏歲歲春風吹不起傳得琵琶馬上聲
古今祇有王與李李氏昔在至元中少小辭家來入宮
一見世皇稱藝絕珠歌翠舞忽如空君王豈為紅顏惜
自是衆人彈不得玉觴未舉樂未停一曲便覺千金直
廣寒殿裏月流暉太液池頭花發時舊曲未終新解譜

新聲萬變總相宜三十六年如一日長得君王賜顏色
形容漸改病相尋獨抱琵琶空歎息興聖宮中愛更深
承恩始得遂歸心時時尚被宮中召強理琵琶絃上音
琵琶調轉聲轉澁堂上慈親還佇立回看舊賜滿床頭
落花飛絮春風急

祖生詩

浦城孝子身姓祖自憐性命如糞土生才五歲遭亂離
有母更被官軍虜零丁二十八春秋母縱得生何處求

天地茫茫明月恨江山漠漠白雲愁
勿心得母書驚母在
看書未盡淚先流書云流落河南縣
河南蹋徧無由見
唐州境上忽相逢白髮蕭蕭霜滿面
誰知喜極情轉悲
旁人更問初別時千生萬死到今日
始為母子東南歸
東南迢遞關山路入門猶記階前樹
居人傳說盡相看
雞黍提携竟朝暮祖生母子真可憐
少壯離別老大還
同時鄉井被兵者幾人骨月能生全
願生母子長壽考
四海昇平永相保

居庸行

昔我望居庸南今日出居庸北嵒巒爭吞吐風水清且激
逶迤數千里曲折殊未息關門兩向當天開馬如流水車
如雷荒雞一鳴關吏起列宿慙淡雲徘徊山盤盤石圍圍
山如龍石如虎龍怒欲騰虎欲舞太行餘勢猶如許昔不
容單車今馬列什伍聖人有道關門開關門開千萬古

長風沙夜泊

長風沙風沙不斷行人嗟行人嗟奈君何南風正高北風起大

船初灣小船喜移船更近大船頭不獨風沙夜可憂但
祝行人好心事長江何處是安流茅舍參差數株柳時
平尚置官軍守青裙老嫗詫鮮魚白髮殘兵賣私酒魚
賤可買酒可沽他人心事知何如

夏五月武昌舟中觸目

兩髯背立鳴雙櫓短蓑開合滄江雨青山如龍入雲去
白髮何人並沙語船頭放歌船尾和蓬上雨鳴蓬下坐
推篷不省是何鄉但見雙雙白鷗過

題明皇出遊圖應制

明皇八駿爭馳道還是開元是天寶長安花發萬年枝
不識年華醉中老奎章閣下文書靜袞衣高拱唐虞聖
莫言此畫徒爾為千載君王作金鏡

高郵城

高郵城城何長城上種麥城下種桑昔日鐵不如今為
耕種塲但願千萬年盡四海外為封疆桑陰陰麥茫茫
終古不用城與隍

如武昌發臨川作

江轉欲無路山回忽似閨客程秋共遠物色晚多疑稍
稍沙鷗集忿忿野樹稀武昌今夜夢定有故人知

送鄉人祐上人從師歸當陽

學道玉泉寺從師天子都流年春事半歸路客帆孤山
勢遙連蜀江聲不入吳故園如可到種芋有遺區

南康夜泊聞廬阜鐘聲

廬山三百寺何處叩層雲宿鳥月中去歸人湖上聞入

空應更迫近瀑正難分遙想諸僧定香爐上夕熏

史館獨坐

地夏天逾近風高午尚寒虛庭松子落欹檻菊花乾撫
卷俱千古憂時有萬端寂寥麟父筆才薄欲辭官

夢武昌

黃鶴樓前鸚鵡洲夢中渾似昔時遊蒼山斜入三湘路
落日平鋪七澤流鼓角沉雄遙動地帆檣高下亂維舟
故人雖在多分散獨向南池看白鷗

送道士薛玄卿歸江東

知君此去漸難招只在人間已廓寥市上有時逢賣藥
山頭何處覓吹簫仙巖花落溪流滿鬼谷雲間樹影遙
未必故山安隱逸海天涼月夜蕭蕭

小孤山曉發和蔡思敬韻

日落霞明錦浪翻崖傾石削白雲間乾坤上下雄孤柱
吳蜀東南壯此闕神物夜移風動地仙舟曉渡月漫山
回瞻絕頂登臨處空翠冥濛杳靄間

歌風臺和李提舉韻

萬乘東歸火德開漢皇曾此宴高臺沛中父老謳歌入
海內英雄倒載回湯沐空餘清泗在風雲猶似翠華來
穹碑立斷蒼烟上靜閱人間幾劫灰

送播州楊宣慰歸藩

雙旌遙指洞庭西十乘連翩度五溪龍虎親軍無使節
犬狼諸獠入封提光昭廟祐恩波遠風動藩維禮秩躋
北望五雲高魏闕亦知憂顧在黔黎

送唐尊師祠武昌

龍袞分香下絳霄羽衣承詔出清朝星臨翼軫南垂潤
神降虛危北極遙金殿壓雲開紫氣玉臺和月合瓊簫
蕃釐更為吾皇祝下國時豐雨露饒

送詹尊師歸廬山

香爐峰色紫生烟一入京華路杳然雲碓秋閒春藥水
雨犁春卧種芝田書憑海鶴來時寄劍自潭蛟去後懸
忽報歸期驚倦客獨憐微祿負中年

送趙尊師分祀海嶽

僊都道士神明後幾度函香去祝釐西歷蠶叢瞻雪嶺
南隨鵬翼到天池昔聞奉詔分祠日正是觀風問俗時
宣室豈無前席夜諮詢應不負驅馳

送大名安治中守汎陽

展驥猶穿魏郡花分符忽指竟陵爪行瞻禹跡過三峽
帶擁義文望五華春雨蠶桑無曠土秋風稻滿貧家
亦知王政仁為本莫厭公田飯有沙

送林彥廣南行香

昔年同事文皇帝出入千門萬戶中漢閣圖書觀每遍
周家典祀學皆通鼎湖忽送飛龍去石鼓空歌我馬同
今日函香南鎮去還尋禹穴酌西風

宋徽宗成平殿曲宴蔡京圖御畫御記

東京諸蔡滿周行延福成平樂未央千畝松篁籠玉殿
九霄風露濕霓裳君臣契合同堯舜禮樂光華邁漢唐
明日圖成仍作記千秋留與監興亡

御書雪林二字賜趙中丞應制

聖主揮毫臨秘閣，親臣執法坐崇臺。
祥雲五色從天下，彩鳳雙飛映日來。
政欲清如林上雪，已聞聲奮地中雷。
君臣千載明良會，咫尺徽垣接上台。

憶昨四首

天歷中年祕閣開，授經新拜育羣材。
宮門待漏常先到，講席收書每後回。
召試時蒙天語勞分題，不待侍臣催。
滿頭白髮丹心在，太液池邊祇獨來。

宮草葱茸禁樹齊日趨延頸對凝輝朝迎步輦花間出
暮送回鑾柳下歸碧殿東浮蒼巘合金河北引玉泉肥
幾回弘慶門前路春氣濛濛欲染衣

已巳羣儒映璧奎端陽侍燕寶慈西線分學士親臣送
詩賜黃姑御手題注酒含春瑤露重承塵轉午錦雲低
日斜共出西門道既醉猶能散馬蹄

奎章分署隔窓紗不斷香風別殿花留守日頒中賜果
宣徽月送上供茶諸生講罷仍番直學士吟成每自誇

五載光陰如過客九疑無處望重華

和張太一秋興四首

翩翩公子五雲中風骨雖殊意氣同道德淵源行地遠
神明臺觀與天通欲隨穆滿賓王母更擬軒轅相大鴻
南國正秋憂旱暵誰驅列缺起豐隆

蓬萊宮闕赤回闌龍虎神君禹步寬朝嚙日華當食敷
夜迎天仗識鳴鑾露飛仙掌金莖凍月滿玄都玉佩寒
遙想西齋清似水吟詩聽到漏聲殘

太行遙接帝王州西北連山際海稠鶴下靜依山館夕
雁啼高挾塞垣秋側身天地渾如寄偷看風雲總是浮
應笑白頭京國裏長年百慮更千憂

霜落燕山斂翠蛾風翻禁樹夕陽多遙聞扈從勞行役
轉恐飢寒損泰和朔月先還沾舊制終宵不寐想鳴珂
深恩未有涓埃補白髮蕭蕭可奈何

李洞字溉之
章閣學士

題漢陽郎官湖

山翁薄莫醉酒歸杖藜迷却高陽池清風吹花綠陰倒我笑謂是秋雲移還乘貫月槎夜過郎官湖崢嶸星斗入江漢蕩漾槎影如鯨魚九華之真人邀我倒玉壺麒麟擘脯供行厨依稀仙樂在空際碧山四映寒蟾孤舉酒酌寒蟾明月下飲姮娥俱霓裳拂雲錦萬荷露瀉瑣瑤枝塵幢掩靄羅烟空乃有玉皇所授之玉童風前飄飄曳廣帶對立十二秋芙蓉清香九曲銀河通真人綠髮披春風錦袍玉雪照天地口說姓字安南公是公多

逸氣略與古昔賢豪同時能掃月色延我石室烟蘿中
又言昔同張謂所遊地長笑一覆丹霞鐘風吹仙樂度
溪去我已醉卧香爐峰

我本山人素志丘壑獲歸名山為願畢矣爰以
四月十一日離京師是夜抵潞陽慨然賦詩
遙慰匡廬隱者并似金門諸公為一噱云

野馬脫羈鞅倏疑天地寬臨風一長鳴風吹散入青冥
間頗如魯仲連蹈海不復還又如安期生長留一鳥今

人看江南浩蕩忽如海落日照耀浮雲闊既不能低眉
伏氣摧心顏詭遇特達驚冥頑又不能抱書挾策千萬
乘調笑日月相廻盤匡廬迢迢接仙山仙翁泛若秋雲
閒長松之陰引孤鶴望我不見空長歎采鉛天池津飲
渌桃花灣蒼梧倒影三湘寒赤城霞氣生微瀾鯨鯢翻
空海波赤曉色欲上扶桑難人間之樂兮誠不足恃何
如歸卧棲巖巒棲巖巒卧巖穴夜半天風吹酒醒猶有

西溪萬年月

寄吳原可

不謂相疎亦自猜
空山舊雨入莓苔
江湖機熟鷗忘去
吳楚年荒雁不來
豪傑何心猶用世
乾坤自古少憐才
向來共醉梅花下
昨夜一枝寒自開

劉汶字師魯，廬州人，尚書

贈劉禹玉

劉郎方朔徒游戲
紫泥海千年華表非
唯有寸心在向來
渾河西雄辨吞虹蜺
手攜九節杖東入蓬萊
栖我時

探禹穴同看山陰雪千人萬人中怪子獨超越朝騎白
鼻騶莫逐油壁車得錢即付酒携妓顏如花踏翻豪俠
窟醉狎山人家或嘲狂楚士或誚報恩子從渠立名多
詎識子竒偉一朝去鄉國北上爭吹噓家無十金產袖
有萬言書所陳果何事為國非自計寧遭丞相嗔肯負
丈夫志蹉跎十數秋甘與黃冠儔善歲倚天劍未暇磨
斗牛幡然走山東隱跡隨壺公還尋岱宗去絕壑凌天
風鷄鳴上日觀眼亂扶桑紅窺臨事未已逸氣橫萬里

行歌齊魯間興為廬山起廬山秀可凌怡此冰雪顏揮
毫洒瀑布五老開雲闕遠公拍手笑喜見遺民還乃知
士不偶正可游名山去年卧衡岳聊憩四海脚厭垂君
平簾懶賣伯休藥却呼魏夫人共把流霞酌今年與山
辭下筆湘水渭臨風弔賈傅酌月招湘累文章本踈蕩
強忍終技癢光怪不可收倏忽又千丈有時遇知音朗
咏山中吟復恐兒輩覺不得容山林茲晨忽聚首慰我
別來久辛勤四十霜所獲竟何有却懷居東時勇以功

名期焉知尚漂泊筋力供路岐攀杯置佳念此去安所
之南窺古雲陽更了山川竒山川固娛目慎勿過幽獨
奈何白雲歌再送劉十六乾坤渺蒼茫回首眷空谷我
將秣其駒乃不受羈束願子無遐心歸哉返初服

郭昂

字彥高號野齋大名人

客燕

昨夜鄉闕入夢遙月明魂斷更難招鬢邊白髮秋能種
囊裏黃金日易消尺璧自慙投暗室前途何處是青霄

龍沙見說難為客八月尖風徹牧貉

林鎮

江南曲

高高碧雲樓粲粲珊瑚鉤娟娟一美人
嫋嫋明雙眸妾居湘江尾君居湘江頭
好風吹桃花同向湘江流

黃伯暘

香奩體

與君生別離朱簾長不開春風故相撩
燕子雙歸來

雙雙相思鳥飛上相思樹相思雖不同同是相思苦
昨夜海棠花睡足西窓雨春夢苦無憑知在阿誰處
下階拜新月空庭夜如水相思隔千里未有團圓意

商挺

水仙花二首

海上三山璧月明人間誰識許飛瓊秋風吹上青鸞背
來散天香與素英

明月珠衣翡翠裳冰肌玉骨自清涼不隨王母瑤池去

來侍維摩病几傍

貢奎

字仲章宣城人江西提學

讀馬伯庸學士止酒詩

今晨不可出大風吹我帷陋巷泥沮洳空牆雨淋漓研
朱課兒書冥思解羣疑敲門童子來袖有止酒詩讀之
至再三擊節且喜悲若飲以玄酒揖讓陶唐時哉哉古
冠裳執彼璋與圭短褐纔掩脰藜藿空忘飢風雅久已
衰作者微君誰嗟我重景仰老大將何為

司業李公哀挽

卷六
元禮

山立庭紳聳衆觀名高真不愧儒冠文章清廟歲琛玉
勛業烏臺振羽翰譽重朝端知有子貧憐身後似無官
百年耆舊凋零盡展卷哀辭忍淚看

謝端

滋溪書堂

趙之川渟浸淶易恒湜汎洨各異出惟滋有溪亦足足
或伏或見舠不容不能百里渟是從混混千里俱朝宗

予曩涉河觀湖江踔雲蕩日怒擊撞歸視子滋嶺之瀧
是滋名揚予所始有田有廬水之涘有堂三楹庫非侈
中經子史堂右左高曾遺予以自課予乃善繼志不惰
蒐今摭古抉怪奇泓涌演迤吐為辭副墨往往傳京師
贏金青紫世所取滋溪有源予有後斯堂斯書可世守

陳應麟字信仲

送薩經歷監舶泉南回京

玉立朝班侍紫宸桐邊一見許清真九霄星鳳人間瑞

萬斛珠犀扇外塵行色急催閨海曙吟情遠逐帝城春
相思一夜江花老夢裏猶疑見可人

宋本字誠夫大興人禮部尚書

大都雜詩四首

拋却漁竿滄海邊拂衣來看九重天畫欄九陌橋如月
綠影千門樹似烟南國佳人王幼玉朝中才子杜樊川
紫雲樓上如澠酒孤負東風二十年

綉錯繁華徧九衢上林辭賦漢西都朱門細婢金條脫

紫禁材官玉鹿盧萬里星辰闢上界四朝冠蓋翊皇圖
東隣白面生紈綺笑殺揚雄卧一區

蘆溝曉月墮蒼烟十二門開日色鮮海上神仙非弱水
人間平地有釣天寶幢珠珞瞿曇寺豪竹哀絲玳瑁筵
春雨如膏三萬里盡將嵩呼祝堯年

形勢全燕擁地靈梯航萬國走王城狗屠已仕明天子
牛相寧知別太平玄武鈎陳騰王氣白麟赤鴈入新聲
近來朝報多如雨不見河南名賈生

殿試罷賦

玉堂松檜帶晨霞遙望宸嚴共拜嘉逢掖諸生袍立鵠
未央清問墨翻鵝扶搖九萬風斯下禮樂三千日未斜
從此君王識名姓煙波慚愧舊漁家

奉旨降香天妃謝翰林諸公贈詩

皇帝甘泉受計時寶奩親授走冰夷今朝朝著張騫出
後夜天文李邵知雲繞勾吳分貝闕春生箕築下龍墀
深慚禮樂光華外賸得曹劉祖道詩

段惟德

河東人
參政

登岳陽樓

羣江西來與天平天壤巨浸開洞庭雄吞三湘隘七澤
中蟠萬古君山青我行持節按廣海驛騎轉駐巴陵城
巴陵城樓冠天下風軒月戶雲霧屏平生夢想今始到
危欄乍倚心竚驚初疑太極渾未判日月往復凌空明
又疑此世墜物外弱水萬里環蓬瀛湖山得意有如此
況乃佳客醉簪纓金杯浮動玉色酒滿懷清思春雲生

魚龍掀舞怒濤起眼花落日搖青冥軒皇廣樂渺遺響
芳洲寶瑟愁湘靈丹丘謫仙竟何許幾欲八表追遐齡
孤心未了忠孝願敢念綠髮潛凋零聖神一視無遠近
恩風化雨浹四溟尋常嘯聚犬豕爾陣烟一洗霏天清
歸鞭咫尺覲慈母細語八千山水程孰能閉置若新婦
正要磊落肝膽橫飲酣拂袖下樓去忽隨過鴈雲邊聲

李仲淵

號銜齋
川參政

送鎔宗道奉使日南

一介強於十萬兵秋風持節使麌冷可容贊普窺唐壤
要遣莎車拜漢廷蜃吐瘴烟黎月暗鯨掀巨浪海雲腥
元戎已辦安邊策萬古千秋汗簡青

送捧詔使

霜落澄江水似藍江亭折柳送鬢參五條溫詔頒天北
一棹清風下斗南父老疲癃沾利澤山川勝概入豪談
渝城好過黃花節金碧臺高酒半酣

送馮參政致仕

天眷雖隆志叵渝拂衣歸去不躊躇百年喬木推者舊
九老香山入畫圖力疾不辭春命駕感恩直欲夜含珠
聖王已有黃金像一舸秋風下五湖

黃靖老

字子肅昭武
人翰林應奉

燕中懷古章貢侍御

娉婷二八女絕色妙難畫新妝薄鉛華照影修竹下盛
年事夫婿錦玉耀精舍雖非伯鸞妻惄然惜春夜琴餘
月當軒默默倚風榭寄語東家兒紅顏莫輕嫁

送李子威代祀嵩衡淮海二首

羣生望甘澤五岳雲氣通天香落岩谷瑞靄春冥濛海
潮天際來金碧森萬峰劃落紫翠堆亭亭玉芙蓉古廟
絲竹存迎神奏黃鐘空山遞餘響落花舞青童

南海祝融宅汪洋載神州巨浸涵萬有元氣何空浮蒼
蒼鳥嶼間彷彿通十洲神魚在深淵甘霖何以求朝折
若木枝夕飲桐柏流萬里一瓣香豈徒司馬遊

古詩四首送王君冕歸陝西

麥熟天乍熱開軒理瑤琴茲晨有客至一經蒼苔深日
出樹影倒曠坐分綠陰清談落餘花松風雜幽禽君子
希道德永言結同心

狂風捲茅屋遙見溪上山人生有遇合離別何足歎黃
鵠將西歸臨水振羽翰我有雙明珠置之青雲端朝朝
復暮暮照君千里還

少年處山谷壯歲遊京師性本猿鶴羣焉能牛馬馳曩
有採薪憂挂冠願為醫近得聖賢心讀書甘如飴習貫

已成癖豈無君子知

十載宦京輦田園就荒蕪茲焉擬歸耕休馬南山隅舉
酒樹色動鶯燕鳴相呼流水既送君白雲亦邀予錦囊
可贈遠愧非明月珠

古樂府二首

君好錦繡妾好明珠錦繡可為服服美令人愚不
如珠夜光可以照讀書

君好春芍藥妾好夏池蓮芍藥多艷色春風迷少年不

如蓮有實可以壽君筵

夜宴友人席上有懷志能照磨暮春會同年所

作因寄

青山林下啼斑鳩綠楊門前嘶紫骝落花成陣作春雨
東風淡淡雲悠悠美人捲簾日在手蝴蝶飛上珊瑚鉤
南溪不見筍成竹擬約滄波同倚樓

貢闈偶成呈同院諸公

射宮圍棘斷經過閒却秋聲太波波風定碧簾聞禁漏

夜殘銀燭見星河仙人共對青藜杖詞客孤眠白玉坡
弱水蓬萊三萬里不知何處月明多

雪夜直宿玉堂

琪樹花生禁漏遲金莖月色近書闈白雲入水春無跡
銀漢橫空夜有輝竹靜似聞蒼玉珮松寒欲傍綠荷衣
乾坤清氣蓬萊表獨對天風拂翠微

張志道別都

竹寺西軒共聽琴杏花猶記紫囊吟溪山老我扁舟興

風雨知君萬里心滄海夜潮雲漢濕蓬萊春樹碧雲深
三年離別尊前話傾倒何時更似今

庚午興聖殿進史

瑤編初進侍明光日麗龍池晝刺長堤柳染成春水色
宮花併入御爐香金壺洒露層堦滑玉枕分冰廣殿涼
矇瞍似知天意喜鳳笙新奏五雲章

友人擬古樂府因題十絕句

早晚臨粧鏡秋容怯玉鉢君心如日月照妾似初年

采荇歸來午
花梢日轉廊
綠陰涼似水
不見洗紅妝
生愛東隣女
蛾眉畫不如
近來機杼廢
臨得右軍書
漫道從軍樂
風霜祇獨居
三年遼水上
不得一行書
海上扶桑景
清光日見君
祇愁風雨夜
西北有浮雲
今夜中秋月
含情獨上樓
星辰三兩點
偏照玉簾鈎
自見南樓月
頻頻夢楚州
無端今夜雨
祇作小山秋
露井踈桐晚
風亭碧藕秋
捲簾山月上
水宿見雙鷗
堂上春花老
流泉日繞山
願為雙白鶴
雲路載君還

天子西巡狩形弓錫虎臣樓蘭何日斬看汝畫麒麟

王沂字師魯襄
陰人博士

廣陵岳宮登瀛橋為王高士賦

登瀛橋上登瀛客曾向瀛洲採玉芝鸞鶴雲閒朝斗夜
魚龍波靜步虛時杯浮翡翠蘭若影袖拂珊瑚鐵網枝
安得琴高騎赤鯉傳書海上問安期

次韻宋誠夫上都書事

日邊音問及滄浪知有飛鴻拂建章黃帽折腰慚鄭老

青雲回首憶韋郎持竿寧解遮西日賜履還看出上方
惆悵平生一杯酒鬢毛林葉兩蒼蒼

寄曹子貞

黃金臺下舊騎驢曾記含香侍玉除禹穴有人尋李白
甘泉無賦似相如潛鱗解舞湘靈瑟病鶴難傳閬苑書
遙想論思翔集地紫薇花點綠苔踈

送馬伯庸

社燕秋鴻十二春相逢疑是爛柯人公車未索長安米

野服曾沾輦路塵日麗天門嚴虎折波搖宮瓦動龍鱗
懸知進講金華殿五色雲中拱北宸

周權字衡之號此山括蒼人

紀信嘆

沛中龍奮砕碣雲咸陽楚炬三月焚兩雄角起鹿在野
三戶有楚無強秦貔貅百萬紛如雪戈矛盡染英雄血
旌旗曉映天河雲兵塵夜暗中原月榮陽數載戰不休
重圍食盡漢亦憂將軍詐帝出降楚脫帝虎口真良籌

無何諸將已平楚事定論功裂茅土獨無旌美到將軍
不得褒名紀盟府男兒死節志已酬瞑目地下夫何求
吁嗟功怨俱悠悠漢廷雍齒還封侯

子陵釣圖

東都熱官手可炙吳儂面似秋江色平生落拓一羊裘
七葉貂蟬不堪易功臣盡在雲臺中丹青化作灰塵空
先生遺像乃在此釣竿尚裹桐江風悠悠世事江雲白
過眼輕帆自朝夕人間萬古仰孤風天上有星猶是客

卷六
九日

座上風流憶孟嘉登高目斷楚天涯百年歲月催蓬鬢
半世江湖負菊花小雨釀寒侵白苧西風憐醉避烏紗
間攜榔栗吟歸路流水殘雲帶晚鴉

次韻友人

司馬山川憶杜遊袖中劍氣尚橫秋懷人空有春天樹
乘興都無雪夜舟年少文章慕西漢風流人物擅南州
縛麟老手今無幾不數當年趙倚樓

多景樓

北固峰高翠色浮，斷崖千尺障東流。
誰言宇宙無多景，今見江山第一樓。
雲氣曉含簾箔雨，濤聲夜落海門秋。
客來莫問孫劉事，狠石苔深萬古愁。

闕下遙瞻

乾坤瑞氣靄燕山，天仗初開虎豹闕。
金爵觚稜銀漢上，玉堦平城綠雲間。
紫泥香暖春宣詔，清蹕聲嚴曉趣班。
千載明良今慶會，喜看新雨滌塵寰。

羅磾谷

幼輿折齒歌

秋衫未成錦機語
棠梨半花鳳一羽
象牀雪綜小龍梭
細穴銀光吐冰縷
西隣郎君東海歸
芙蓉半白杏雨肥
十二欄邊說幽怨
勸織南浦鴛鴦飛
含蘭匿蕙無消息
春醒彤霞漾玉色
小龍呵出風雨聲
奔騰觸裂雙白石
白石國城三十六
女子軍來兩城覆
鸞歌猿嘯強激昂
百戶風來如箭簇
章臺公子真豪縱
復以微言相感動

郎君切莫更癡心忍作甘心可人痛

胡尊生

送君進周公

憶君初來湖水滿金鱗潑刺春波暖江南早晚雪花飛
蒲帆下水送君歸霜風浙瀝湖光晚白魚粳米中流飯
回頭咫尺廬山雲一寸心長帆力短臨分乍覺過重闈
金螺移在雙翠眉啞啞靈鳥啼樹枝家人夜夜卜蛛絲
雪醅新釀都昌酒欲來不來待君久人言遠歸勝新婚

稚子牽衣婦攜手牕前紅燭宵彈棊新歡滿眼寧相思
江南今歲梅開遲贈君無花折空枝明年花開來不來

瓊花上天

無雙亭前浮冷月蕪城暗鎖腥煙黑仙魂夜吟天欲泣
巫陽下招飛玉勅神風鬼雨鞭車急一株玉雪雪中立
金車歲歲朝袞龍異香蕩漾天水濃蓬萊峩峩高北斗
玉佩沉沉舞哀柳瑤京三月銀雪飛瓊仙瓊仙招不歸
釣天夜奏紫皇醉二十四樓寒浸水

金莖承露

蓬萊仙人騎黃鶴來遺劉郎不死藥銀漏無聲秋夜深
時見星河頭上落精金糾錯蛟龍蟠未央闕角觚稜寒
莫教仰見杯中物直是他年雙淚痕桂房椒壁蕙蘭老
留得新愁向雲表猶逐官車出漢闕茂陵蕭蕭濕青草

陸文圭

燒筍賦

先生朝盤厭苜蓿筍味得全差勝肉蒼頭掃地犀角出

赤燄燒空龍尾禿土膏漸渴外欲枯火灰微濕中已熟
撥灰可惜衣殘錦解繩猶憐膚濯玉青青無分長兒孫
草草為人供口腹李家丞相蒸葫蘆石家美人煮豆粥
去毛留項有何好擣韭作虀空自速不如野人工食淡
自辦行厨入修竹向裏曾參玉版師胸中會着簣簷谷
主人不問不須嗔昨夜西風響林屋

胡東

贈別二首

杜鵑啼血正傷神又向尊前送遠人君到瀘溝看流水
落花猶是禁城春

一絲春動柳枝柔塵壓征鞍駐紫骝莫惜尊前更斟酒
醉中別去不知愁



元音卷六

欽定四庫全書

集部

元音卷七

詳校官中書臣丁榮祚

助教臣常循覆勘

總校官降調編修臣倉聖脉

校對官修撰臣吳錫齡

謄錄監生臣薛炳文

欽定四庫全書

元音卷七

王士熙

字繼學東平人制東廉使

送蘇公赴嶺北行省郎中

居庸關頭亂山積李陵臺西白沙磧畫省郎官貂帽側
飛雪皚皚馬驥濕馬蹄雪深遲遲行冷月樓雲塞垣明
鐵甲無光烽不驚萬管角聲如水清明年四月新草生
征人賣劍隴頭耕思君遙遙隔高城南風城樓來雁鳴

和馬伯庸寄袁學士

白雪賡歌少朱弦詠歎長天池鷗獨運霧谷豹深藏舊
地收華戟新田買石房閒情齊綺皓時論佇班揚瑚璉
登周廟宗彝畫舜裳西昆分顓氣南斗避寒芒六月潔
陽扇三秋鏡水航彈琴無俗曲辟縠有仙方玉海羞麟
脯金莖饋露漿書空忘咄咄文障拂堂堂翰府聯芳遠
樞庭奕葉光名山畱史策烏國售詩章節擬芝田鶴音
諧律管鳳寫經酬道士立塔禮空王藉草連裾碧分韻

注酒黃竹牀吟几小紗幘鬢絲涼離別三生夢歸依一
瓣香升堂乖笑語在野愧才良雲擁鄆山雨潮生定海
洋何時宣室召四馬驟康莊

題玩芳亭二首

何處春來好城南尺五天地幽迷曉樹花重壓春煙上
客拋羅袂佳人舞畫筵晚來清興熟移坐曲池邊

留客青春過題詩碧霧寒亂鶯穿舞幃輕蝶立回闌白
日閒斟酒清時早挂冠主人多雅興不覺玉卮乾

題鮮于伯機與仇廉訪帖

三生文采趙公子四海聲名仇使君彈琴不作廣陵散
焚香遙駐博山雲玉署春來鶯漫語繡衣人去雁空聞
龍蛇兩紙光如玉即是安西與右軍

其帖曰趙公子明日欲過寒舍廉訪

相公能一來焚香彈琴亦佳趙公子子昂也

送袁德平歸越

平湖如鏡靜秋波禹穴西風捲碧蘿狂客有船都載酒
道人無字不籠鵝牀頭舊笏青雲近窗下殘編白雪多

燕市塵深拂衣去海門何處問漁蓑

送虞伯生代祀還蜀用袁伯長韻

蜀道揚鞭舊險摧家山遙認石雀嵬奉香暫別金鑾去
題柱真乘駟馬來祠罷汾陰迎漢鼎路經驪谷弔秦灰
歸釐宣室虛前席不似長沙遠召回

送巨德新

渭城秋水泛紅蓮白雪梁園作賦年金馬朝回門似水
碧雞人去路如天揚雄宅古平蕪雨諸葛祠空老樹煙

小隊出游春色裏滿蹊花朶正娟娟

壽劉邢公

詔下金鑾第一廳春風湛露譙趨庭嘉辰又紱蒼麟角
仙侶同驂白鶴翎衛武高年猶入相韋賢老日只傳經
崆峒別有長生訣杖几凝香酒半醒

送袁道士

五公舊譜漢庭傳之子飄飄去學仙山裏牧羊成白石
雲間騎鶴上青天黃庭夜月吟三疊綠綺春風度七絃

拂袖京塵留不住別離可柰落花前

軒轅雲裔越公家學道青山幾歲華仙覓安期曾授棗
詩成湘子解開花金砂擬煉長生藥銀海初回遠使槎
二十四巖明月夜簫聲何處落煙霞

題節婦

寒窗機杼泣秋風鏡影鉛雲不汝同明月有光生夜白
貞松無夢妬春紅羅襦舊繡天吳拆綠綺離弦海鶴空
陌上行人指華表閉門疎雨落梧桐

驪山宮圖

翠嶺含煙曉仗催五家車騎入朝來千峰雲散歌樓合
十月霜晴浴殿開烽火高臺留草樹荔枝長路認塵埃
月中人去青山在始信昆明有劫灰

寄上都分省僚友

天上風清暑盡消尚方仙隊按雲韶白鵝海上生鷹獵
紅藥山岡詐馬朝涼入賜衣飄細葛醉題歌扇濕輕綃
河堤楊柳休傷別八月星槎到鵠橋

上京次伯庸學士韻

侍臣催講御堦西雲靜觚稜曉色低天闢神州卑兩漢
地連碣石轉三齊含香晝永閒青瑣視草堂幽濕紫泥
最憶東山老松樹秋風應有鶴來栖

送王在中代祀秦蜀山川

太華雲連蜀棧低柳花三月紫騮嘶香浮曉露金奩濕
旛拂春煙絳節齊策牘當年吟桂苑詞林後夜趣芝泥
長安遊客應無數誰共王褒頌碧雞

李宮人琵琶引五絕

瓊華春島百花香太液池邊夜色涼一曲六么天上譜
君王曾進紫霞觴

鸞輿三月幸龍岡宣喚新聲促曉妝撥斷冰弦秋滿眼

塞天雲碧草茫茫

紫檀別殿鎖春光鈴索聲聞白日長不似開元教坊曲
太真微醉撥龍香

一入深宮歲月長承恩曾得侍昭陽檀槽按出新翻曲

五色雲中落鳳凰

劖舞當年識大娘
花奴羯鼓漫悲傷
貞元朝士仍多在

應笑青衫泣白郎

薛漢字宗海，永嘉人，國子助教。

送馬少卿南祀

總章盛金德，齊明赫當寧。
皇皇遣天使，肅肅承聖語。
三熏禮岳瀆，萬里涉梁楚。
祝釐歸堯舜，降神出申甫。
南斗迎文星，西風起儀羽。
樂張洞庭月，旆濕湘岸雨。
壯吟鄙

騷怨高談洗儒腐過家猿鶴喜攬轡鴻雁聚青闈閔賢勞黃屋深記注歸騎慎勿徐席虛玉堂署

送牟伯厚還雪

西風起雙鴻渺渺度萬山空林霜霰落各念飲啄難中途忽相失獨畱諒無歡極目送冥飛風雲逆脩翰低回守矰網自顧形影單奮翅念遠舉天路浩漫漫空想五湖水東風漲波瀾

和虞先生筋香

奇芬擣精微纖莖挺脩直炮輕雪消腕火細螢耀夕素
煙裊雙縷暗馥生半室鼻觀靜裏參心原坐來息有客
臭味同相看終永日

雪山盤車圖

車焞焞石徑聳確輪欲推疲牛分寸挽莫前前車後車
相逐來大府城門倚天開羣山雪深白皚皚卒夫鞭牛
凍墮指轉輸號令如風雷官中委積等塵土黔黎膏血
無復回君不見明時屢散粟與帛桃林之牛亦悠哉不

知何代畫此景我自一見令心哀

送柳湯佐

太行盤踞勢嚴嚴五馬初行衆具瞻他日去思應借寇
此時來暮正歌廉七賢舊竹風流在萬善新茶歲貢兼
莫謂名邦天稍遠飛龍曾向此中潛

送趙虛一降香至南海廬山會稽

天香分下殿西頭處士今乘使者驂曾是騎麟參北斗
真成跨鶴過揚州山中五老應相識海上三神亦易求

勾越東南仙柱觀神光依舊貫林丘

題趙顯卿友義卷後

古稱燕趙多豪俊今向燕山得趙君中歲挂冠心似水
間時說劍氣如雲撫箋每為山聲合囊橐曾因友誼分
七十長年天所相名駒汗血更超羣

和太子贊善馬祖常無題韻四首

羽林垂彩動天江幕府光懸白玉幢吏法有章皆畫一
將壇得士故無雙臺中長夏霜凝簡拔內通宵霧斂窗

若使九門容徑入肯思巖隱抱流淙

良人執戟侍明光誰與金鑪共夕香妝鏡曉寒凝蝶粉
舞衣春暖卸鶯黃渡江桃葉應憐我照水荷花似見郎
歎息褰脩無復理愁思摻手為縫裳

乘槎準擬逐秋潮卻訪成都萬里橋滄海有山皆縹渺
青雲無路不迢遙閒居潘岳驚斑鬢歸去陶潛懶折腰
後夜相期明月上露臺高處弄笙簫

驥服鹽車兩耳垂臂無九折未成醫欲尋箕願終逃世

苦恨章縫不入時金井蛩鳴知露冷銀橋鵠度見星移
長貧久客應無補擬挽滄浪塞漏卮

壽承旨張疇齋

鍾王書法得精微每日霜毫不厭揮相業曲江金鑑錄
幽懷西塞綠蓑衣蟠桃開日三千歲古柏參天四十圍
應與赤松相伴約他年名遂早知幾

夜歸

有客有客胡不歸長安三見秋葉飛警霜老鶴夜不寐

弔月孤雁寒無依紛紛北里厭粱肉落落西山甘蕨薇
人生窮達各有命何須終夜泣牛衣

閑閑宗師生朝

天正子月一陽回春入環樞已放梅壽酒淋漓傾九醞
仙階縹缈接三台函關昔日青牛度華表他年白鶴來
更向何方覓鼈島帝垣東畔是蓬萊

員怡然

月中桂

靈風吹老樹婆娑輪滿旁枝長漸多萬古秋香懸宇宙
一株晴影照山河雲間銜子無黃鵠天上看花有素娥
折向人間應不識九重清露濕鳴珂

王子東

採桑歌

翻雲烏鵲影鬱鬱颺風白燕雙僂僂橫波凝流斂秦娥
吳蠶飼餒飢則那十纖挽柔剪綠柯六幅暗露侵襦絳
饗飧驚誤畧隙過蠶飢葉稀寧不瘥千頭萬緒豈敢叱

終以暖事期絲綺錦帷繡幌相婆娑人情好新不厭多
倚門刺紋來聽歌載青載黃胡側闕樹間耳語慎勿哦
萬一出口他人訶纂纂桑甚如鳩何

歐陽玄

字原功號圭齋廬
陵人翰林承旨

癸酉八月廿一日上賜經筵官酒饌許泛舟太
液池趣西苑伯脩蘇君有詩遂次其韻

鼈極天初補娥池月已修鮮飈生廣廈清旭映垂旒玉
漏聰無壅重瞳視不流凝神思燕翼虛已納鴻猷章撤

金爐炮筵收玉罇浮甘泉歸步遠太液便程優鸚鵡樓
宮樹鳩鵲避客舟商耆老漢幣瀛儕膳唐羞名輩應相
語明時豈易疇徘徊西掖晚鴈影度延秋

從祀郊天禮成應制

紫壇黃幄夜無風牲璧初陳月正中瑞靄霏微成五色
神光烜赫映重瞳千官屏息瞻天表萬國關心在聖躬
清曉慶雲高捧日簫韶前導駕還宮

題壺清

朝飲層冰淪性靈夕殞秋露引脩齡江湖大瓠中無物
海嶠方壺外有情貌似神巫機闔闢醉邀市掾酒芳馨
何人欲作先生傳長憶寒趙月滿庭

過洞庭二首

白沙隱隱見金鼈殿閣憑虛結構半天水渾融浮太極
神人幽顯隔秋毫龍堂深閨靈棲冷象緯低垂客枕高
欲作廟堂迎送曲杜紅蘅碧盡離騷

媧皇搏土擲虛空屹立君山面勢雄一畫犧圖天地骨

九江鯨觀鬼神功
裾飄帝子蒼茫外
樂奏釣天湏洞中
頗恨當年鄒魯客
觀瀾未到楚諸熊

聶古柏

番禺道中

玉斧飛霜大庾南
萬松蒼翠洗煙嵐
雲開梧野山羅戟
月滿韶江水潑藍
椰子漿寒殊似蜜
荔支香煖絕勝柑
中朝耆舊如相問
鳥語啾啁正未堪

番易和程世良巡警官

年少將軍意氣雄
迺翁憲府舊乘驄
魯中詩禮有庭訓
江左衣冠多士風
玉樹青蔥秋色裏
明珠炫爛月華中
滕王閣上重回首
後夜相思寄別鴻

張起巖

題楊宣慰雲南頌後

揮戈如筆筆如刀
帥閫文場有此豪
絕域建功追定遠
明時獻頌效王褒
風雲際會扳鱗貴
竹帛光榮汗馬勞
吏草新銘刻銅柱
不須辛苦學離騷

龍仁夫

字觀復號麟閣江西永新人甘肅提舉

陳平章席上題琵琶亭

老大蛾眉負所天
卻將遺恨寄哀絃
夜深正好看明月
却抱琵琶過別船

赤壁

踣呂摧袁虎視耽阿瞞氣勢捲江南磯頭一霎東風轉
天下江山自此三

柯九思

字敬仲丹丘人祕書博士

賦花上月送沃洲良上人

林園念良會花月含清輝娟娟媚繁華皎皎澄芳姿臨
池春弄景轉樹夕藏霏凝香翡翠益散影沾羅衣飛觴
昔忘曙秉燭貴及時欲隨夫適廢行樂願無違

送陳玉林

鳳去臺空思惘然道人和淚詰當年珠宮錫號開三島
金榜承恩自九天花落御牀霑宿霧苔生輦路濕蒼煙
春來怕渡秦淮水處處青林啼杜鵑

元日朝會大明宮

軒冕朝元湧翠埃中天鷄唱內門開雲飄五鳳層樓矗
日繞羣龍法駕來謁者引班聯寶帶上公稱壽進金杯
撞鐘告罷宮花側人指儒冠錫宴回

送王誠夫無錫知州

黃金橫帶爛輝光出守寧辭道路長鵠序久陪蒼水使
鳳池曾赴紫微郎雙旌坐鎮清溪月列戟看凝宴寢香
肯汲惠山泉見寄青春煮茗當還鄉

杜本

字伯原號清碧京兆人

寄楊仲宏

老來自愛黃叔度少日空期魯仲連高卧獨無田二項曳裾誰有客三千滄波渺渺浮鷗鷺白日翩翩換歲年郤憶江東楊少尹劇談終夜不成眠

寄酬虞伯生學士

滿窗風雨夜沉沉獨對清燈萬古心徒有故人憐白髮自無奇骨換黃金茅檐暖日雖堪獻竹簡遺經政用尋

宣愧執鞭非所好甘隨麋鹿放山林

元日縱筆

天歷三年王正月乾坤闢闢再清夷仁明天子龍鳳表
義勇將軍虎豹姿且願農家收小麥莫教贊婦賣新絲
萬方寧謐綱常正始是君臣際會時

韓性

字明善
會稽人

題水仙圖

洛下風流人人言影亦好況乃蛟宮仙迴立清溪表翠

裙濕涼蟾晴光白如掃坐對冰雪容不受東風老澄江
渺予懷相期拾瑤草

黃潛字晉卿金華人國子博士

效古五首

上山見明月下山月相隨月豈知愛我我行自見之故
山日以遠故人不可思殷勤謝明月願爾無時虧
女美衆所悅士窮世所輕輕重安足言泥盡水自清淮
陰初寄食曲膝胯下行季子黃金多妻嫂來相迎自古

已復然歎息空吞聲

擊石乃有火石火光不揚攀天亦有路天高路何長嗟
城萬里雲下覆歌哭場富貴誠足多貧賤不可忘

落花隨風吹各自東西飛花飛既不息水流復無極同
生不同歸能勿異顏色木生則有枝豹死則有皮悠悠
岐路間多言亦奚為

飲酒莫盡醉盡醉無餘歡讀書莫弔古弔古多悲酸蕭
艾叢中野白露摧芳蘭鳳凰不得食鶴巢食琅玕去去

復去去採芝青雲端

宣城客中

眼看雲霄擁勝流漂零回首渺沙鷗黃塵烏帽空奔逐
白飯青芻復此畱未必嵇康能作吏何妨李廣不封侯
敬亭雲鳥知無恙款段惟須逐俊遊

金陵懷古

五雲零落渺天涯陳迹蒼茫日自斜畫角已吹邊塞曲
紅藍新長內園花可憐遺老理黃壤曾倚春風望翠華

好在北山猿與鶴依然同住舊煙霞

夏日即事

枕上初殘柏子香
鳥聲簾外已斜陽
碧山過雨晴逾好
綠樹無風晚自涼
芳歲背人成荏苒
好詩和夢落蒼茫
求羊何不來三徑
門掩殘書滿石牀

題青山白雲圖

十年失脚走京塵
忘却青山與白雲
忽見畫圖疑是夢
冷花涼葉思紛紛

金陵送友

青楊河畔杜鵑啼
歸路如弦定不迷
應到故山叢桂裏
笑人騎馬聽朝鷄

獨坐漫書

漢室需材訪隱淪
販繒屠狗各求伸
可憐風雪南山下
別有當年射虎人

李坦之

姑蘇臺

吳王宴罷歌臺晚斜日清江映闌轉臺上西施醉捧心
江邊東越愁嘗膽鷁夷裏戶去不還麋鹿散迹遊其間
秋深明月照高樹驚鳥啼落丹楓寒功名獨羨陶朱子
一葉扁舟弄雲水

弔古行

蒼梧之南湘水頭煙波逐客增離憂重瞳孤墳閟白日
雙娥貞珮搖清秋江空夜聞鬼對泣泣罷仍為鼓瑤瑟
瑟聲漸杳江聲長丹楓墮影天霜白臨江被髮招帝魂

拔劍欲斷東流奔東流無窮弔不返嗚呼薄俗無由淳

薩都拉字天錫，閩人。憲門

人閩憲知事

題壽監司所藏美人織錦圖

卷中織錦秦川女大姬啞啞美機杼小姬織倦何所思
簾幕無人燕雙語成都花發江水春門前馬嘶車轔轔
髻雲兩耳看欲墮蛾眉八字畫不伸行人一去無消息
冰蠶吐絲成五色柔腸九曲細如絲萬縷春愁正如織
綺窗睡起聞早鶯西樓月落金盆傾暖霞拂地海棠曉

香雪潑戶梨花晴日長深院機聲動梭影穿花飛小鳳
水心驚起雙鴛鴦花底不成蝴蝶夢纖纖玉手柔且和
香鉤小鞶裁春羅滿懷心事付流水盪目雲錦迴晴波
佳人自古多命薄風裏柳花隨處落豈如醜婦嫁田家
生則同衾死同椁君不聞長安城中花滿枝東家蝴蝶
西家飛籠中鸚鵡喚新主門裏侍兒更舊衣又不聞田
家婦日掃春蠶宵織布催租縣吏夜打門荆釵布襪夾
短袴我題此畫三歎吁百年醜好俱虛無排雲便欲叫

閻闔為上獻上幽風圖

鸚鵡曲

有以繡枕見惠枕上繡貴妃看鸚鵡高力士侍側善其補製得體為鸚鵡曲以答之

水晶簾垂宮漏長猩色屏風圍繡牀美人春睡苦不足
夢隨飛燕遊昭陽覺來粉汗濕香臉一線深紅枕猶淺
三十六宮在眼前五色輕雲隨目轉牙牀端坐楊太真
雲冠霞珮絳色裙雙成小玉各宮樣繡衣烏帽高將軍

雕籠七寶挂高樹玉案金盤看鸚鵡可憐鸚鵡解人言
不說漁陽動鼙鼓乃知禽語能戲人不知人語能殺人
亡家敗國汚天地天生尤物天亦嗔一朝豔質化塵土
可恨可憐千萬古香魂不逐馬塵飛猶託深閨繡房女
想當袢袂欲繡時停針想像心如絲繡成時自比容貌
伏枕自喜還自悲郎官有此從何得見慣梅花心似鐵
偶然持贈百拙人眉毛眼睛生百色少年得此惱斷腸
錦屏繡褥蘭麝香夜深酒醒換銀燭時見楊妃在耳傍

張麗華陳宮井銅雀章臺煙燼冷繁華一夢人不知萬事邯鄲呂公枕

華清曲題楊妃病齒圖

沈香亭北春晝長海棠睡起扶殘妝清歌妙舞一時靜
燕舞鶯吟空斷腸朱唇半啓榴房破臙脂紅注真珠顆
一點春酸入瓠犀雪色鮫綃濕香唾九華帳裏薰蘭煙
玉肱曲枕珊瑚偏金釵半脫翠蛾歛龍鬢天子空垂涎
妾身日侍君王側別有閒情向誰說斷腸塞上錦裯兒

萬恨千愁言不得成都遙進新荔枝金盤紫露甘如飴
紅塵一騎不成笑病中風味心自知君不見華清宮一
齒作楚籠禍齒又不見馬嵬坡一身濺血未是多漁陽
一日鼙鼓動始覺開元天下痛雲臺不見漢功臣三十
六牙何足用明眸皓齒今已矣風流何處三郎李

燕姬曲

燕京女兒十六七顏如紅花眼如漆蘭香滿路馬如飛
翠袖籠鞭嬌欲滴春風淡蕩搖春心錦箏銀燭高堂深

繡衾不暖錦鴛夢紫簾紅霧天沉沉芳年誰惜去如水
春困着人倦梳洗夜來小雨潤天街滿院楊花飛不起

過嘉興

三山雲海幾千里十幅蒲帆挂秋水吳中過客莫思家
江南畫船如屋裏蘆芽短短穿碧沙船頭鯉魚吹浪花
吳姬盪槳入湖去細雨小寒生綠紗我歌水調無人續
江上月涼吹紫竹春風一曲鷓鴣辭花落鶯啼滿城綠

病中

病形如瘦鶴照影向清池自有冲霄志游魚莫見疑

送宣古泉

鐵画小將軍旌旗照海門兵機出孫武膽氣走桓溫社
稷劍三尺乾坤酒一尊茫茫天壤內此意共誰論

次王御史韻

江城連日雪騎馬欲何之老樹昏鴉集寒塘落鴈遲松
窗燈下酒竹屋夜深棋寄語王公子幽棲或可期

丁卯歲及第謝恩

禁柳青青白玉橋無端春色上宮袍卿雲五彩中天見
聖澤千年此日遭虎榜姓名書勅紙羽林冠蓋豎旌旄
朝回龍尾頻回首午漏花深紫殿高

登石頭城

登臨未惜馬蹄遙古木秋高萬葉彫廢館尚傳陳後主
新碑猶載晉南朝年深輦路埋花徑雨壞山牆出翠翹
六代興亡在何處石頭依舊打寒潮

贈女道士

不見遼東丁令威，舊遊城郭昔人非。
鏡中春老青鸞去，華表山空白鶴歸。
石竹淚乾斑雨在，玉簫聲斷彩雲飛。
洞門花落無人掃，獨坐蒼苔補道衣。

訪揭曼碩

城中車馬多如雲，載酒問字無一人。
碧桃花開光豔豔，硯池水暖波粼粼。
先生楷書白晝靜，家童畫紙烏絲勻。
落紅滿地送客去，十年不見江南春。

題舒真人仙山樓觀圖

瑤花琪樹間霓旌十二朱樓接五城臺上吹簫秦弄玉
雲邊度曲許飛瓊光流漢殿青鸞舞霞擁函闕紫氣明
方丈蓬萊俱咫尺不須東望問長生

次韻送虞先生入蜀代祀

芙蓉仙掌座中低后土宵光手可齊閣道蹴雲衣有潤
蜀天漏雨石無泥岐山過馬應聞鳳陳寶停舟莫信鷄
揚馬大邦文物盛題詩須近草堂西

寄額森布哈仲實除侍儀通事舍人

舍人楚楚好容儀立在清朝白玉墀紫袖窄衫花萼遶
黃金小帶荔枝垂綵旗拂柳春班卷宮漏穿花午仗移
朝罷太平無事日芙蓉葉上好題詩

寄勾曲外史

霞佩翩翩出洞天當時彷彿見臞仙幾年海上張公子今
日山中葛稚川滄海塵飛丹已熟玉堂人去榻空懸林
間載酒來相覓乞寫丹經與世傳

芙蓉

斑簾十二捲輕碧秋水芙蓉閣畫闌繡扇迎風霞透影
錦袍弄月酒生寒湘魂翠袖留江浦仙掌紅雲濕露盤
只恐淮南霜信早絳紗籠燭夜深看

登鳳凰臺御史大夫易釋董阿公索詩援筆應
命

六朝歌舞豪華畢商女猶能唱後庭千古江山闔故國
幾番風雨入空城鳳凰飛去梧桐老燕子歸來楊柳青
白面書生空弔古日陪驄馬繡衣行

奎章閣觀進皇朝經世大典

文章天子大一統館閣詞臣日纂修萬丈奎光懸鳳闕
九重春色滿龍樓門開金鑰芸香動簾捲銀鈎硯影浮
聖德日長萬樂暇墨花流出鳳池頭

送馬伯庸除南臺中丞

僕駒驛遠迓至上京復改徽政以詩贈別伯庸

有煙雨
萬竿圖

江南驛使路迢遙却赴龍門望海潮桂殿且留修月斧
銀河未許度星輶隔花立馬聽更漏帶月鳴珂趁早朝

祗恐淮南春水滿萬竿煙雨綠相招

送管監司之廣東元帥

持節曾臨江漢上分符又入瘴雲間花驄一日行千里
金虎三珠照百蠻夜帳旌旗天接水秋營鼓角月連山
九重應有平猺詔日聽將軍奏凱還

贈劉雲江宗師

道人推轉阿香車童子穿雲拾翠華天上賜衣霑雨露
山中詩錦織雲霞瑤壇紫氣秋橫劍石室丹光夜走砂

擬借茅君三白鶴乘風騎到玉皇家

寄王本中

王郎楚楚金闈彥五鳳樓前看鬪雞花外漏傳銀箭午
日邊班退紫宮西吟詩月白傾盤露歸馬春紅踏錦泥
應念樓遲江左客破窗燈火雨淒淒

宮詞二首

清夜宮車出建章紫衣小隊兩三行曲闌干外銀燈過
照見芙蓉葉上霜

楊柳樓心月滿牀
錦屏繡褥夜生香
不知門外春多少
半醉移燈看海棠

申屠駢字伯駢

金山寺

層層紺宇裏崔嵬
腳底江濤殷怒雷
塔影暗搖坤軸動
鐘聲晴擊海門開
僧臨水府洞中出
人泛仙槎海上來
六鑿塵埃俱洗盡
不知身在妙高臺

歐陽伯恭

題蘇武李陵泣別圖

祈連山前箭如雨渤海海邊瓶不乳同是肝腸十九年
白髮君歸朝故主臣心有血一斗許亦欲隨君歸釀鼓
五千健兒五千母臣若獨歸魂魄苦空將老淚寄君歸
歸拜茂陵墳上土

于介翁

感古引

孔明梁父吟深不滿於齊相烏乎天若祚漢孔明不

死天下事未可知吾於此重不滿焉

建安天下如潰瓜一搘之外非吾家黃屋飄颻定何許
龍為魚兮鼠為虎老瞞詐力敢欺天朶頤漢鼎方垂涎
紫髯將軍一攘臂控荆引越三十里慷慨山東大耳兒
南飛烏鵲棲無枝草廬一語君臣契目中久矣無吳魏
堂堂大義凜不磨靈闕劖閣爭嵯峨昨晚西南一星落
六尺之孤竟誰託渭水旌旗歸故都江上空存八陣圖
抱膝長歌出師表古柏蒼蒼為誰老

達德越士

字仲達

雨華臺

漠漠平蕪碧蕭蕭亂葉紅褰衣上危石欹帽立西風日
月奔馳外江山感慨中他鄉對零落那放酒杯空

送欽上人遊錢塘

淮南來往熟惟我最相知年少堅持律心空不廢詩春
泉閒聽處野寺獨歸時遙想猿啼夜懸燈話所思

吳金節

字成季號閑宗師特進

六月六日早朝寄山中諸友

五年四覩六龍飛又領羣仙覲紫微金殿煙霞浮黼戾
玉階日月麗旌旗羣臣奉璽勤三讓國母臨朝重萬幾
遙食蟠桃知幾次客星還照釣魚磯

送原功大監南歸

漸覺文星闕下稀奎章兩見送行詩渭城朝雨歌三疊
湘水秋風賦九疑國典紬金藏鳳闕詞臣步玉即龍墀
席前時有蒼生問可向江南久別離

送虞伯生使蜀

送別應思舊所經
秦川花柳短長亭
三峯高拊仙人掌
萬里先占使者星
錦水東流江月白
漣闕西去蜀山青
當年不盡登臨意
待爾重鐫劖閣銘

獲玉印

三茅山道童遇白兔入穴掘之得一玉印乃九老仙
都君印宋宣和時物也

瑤瑛篆刻鎮華陽猶帶宣和雨露香玉兔有靈開地藏

金童無意得天章九重臺上增春色萬里書中耿夜光
喜遇明時薦神瑞三君珍重護宏綱

薛元義字元卿

送丈郎中使交趾

天子龍飛統萬邦玉符封檢下殊方遠人盡是雕題獠
奉使惟應粉署郎翡翠飛時銅柱濕鷗鵠啼處石門荒
炎風苦雨煩珍重萋葉檳榔取次嘗

題劉京叔歸潛堂

獨構茅堂養道真滿前俗事罷紛紜磻溪夜釣波心月
汾曲春耕隴上雲長笑熊羆勞應夢肯教猿鶴怨移丈
近來傳得安心法萬壑松風枕上聞

張雨字伯雨號貞居

碧筒飲

採綠誰持作羽觴使君亭上晚尊涼玉莖沁露心微苦
翠蓋擎雲手亦香飲水龜藏蓮葉小吸川鯨恨藕絲長
傾壺悵展琳瑯袖笑絕耶溪窈窕娘

上京賜宴王眉叟有詩次韻

從事何緣過草堂，行都遣使玉壺方遠勞。
使者紅塵騎爛煮，仙家白石羊中聖。
敢辭十日醉，承恩獨許四明狂。
金莖臘有三清露，潤及葵心向太陽。

天師素華閣

仙家樓觀風塵表，更築凌空月榭高。
虛白豈知存夜氣，太清還許隔秋毫。
溪光澹澹冰填壑，松響離離雪舞濤。
此去銀橋通咫尺，神山直下有靈鼈。

اً

元音

مکالمہ کیا ہے؟

元音卷七